

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
KANTONALNI SUD U ZENICI
Broj: 41 0 K 093825 23 Kž
Zenica, 26.10.2023.g.

U IME FEDERACIJE BOSNE i HERCEGOVINE!

Kantonalni sud u Zenici u vijeću sastavljenom od sudija Tešnjak Nermin, predsjednika vijeća, Ismar Jukić i Enes Maličbegović, članovi vijeća, uz sudjelovanje zapisničarke Anite Topić, u krivičnom predmetu protiv optuženog Limo Sabrije, zbog krivičnog djela Zloupotreba položaja ili ovlaštenja iz člana 383.st.1. KZ FBiH¹, odlučujući povodom žalbe Kantonalnog tužitelja iz Zenice, podnijete protiv presude Općinskog suda u Visokom broj 41 0 K 093825 23 K od 29.08.2023.g. na sjednici vijeća održanoj dana 26.10.2023.g., donio je

P R E S U D U

Uvažava se žalba Kantonalnog tužitelja iz Zenice, pa se presuda Općinskog suda u Visokom broj: 41 0 K 093825 23 K od 29.08.2023.g. preinačava u odluci o kazni, tako što se optuženi Limo Sabrije, za krivično djelo za koje je tom presudom oglašen krivim, uz primjenu člana 49.st.1. i 50. tačka b) KZ FBiH, osuđuje na kaznu zatvora u trajanju od 4 (četiri) mjeseca.

U ostalom dijelu prvostepena presuda ostaje neizmijenjena.

Obrazloženje

Presudom Općinskog suda u Visokom broj: 41 0 K 093825 23 K od 29.08.2023.g. optuženi Limo Sabrije, oglašen je krivim da je počinio krivično djelo Zloupotreba položaja ili ovlaštenja iz člana 383.st.1. KZ FBiH pa je prvostepeni sud optuženom na osnovu istog zakonskog propisa te na osnovu članova 42., 49. i 62. KZ FBiH, izrekao uslovnu osudu kojom se optuženom za počinjeno krivično djelo utvrđuje kazna zatvora u trajanju od 7 (sedam) mjeseci, a koja se neće izvršiti ako optuženi za vrijeme od 2 (dvije) godine ne počini novo krivično djelo.

Istom presudom na osnovu člana 202.st.1. u vezi sa članom 199.st.2. tačka g) ZKP-a FBiH, optuženi je dužan platiti sudu na ime troškova krivičnog postupka u vidu paušala 20,00 KM i troškove postupka u iznosu od 926,65 KM, sve u roku od 30 dana, po pravosnažnosti presude pod prijetnjom izvršenja.

Na osnovu člana 212.st.3. ZKP-a FBiH oštećeni firma „Milenium International Inc.“ Sjedinjene Američke Države se sa imovinsko pravnim zahtjevom upućuje na parnični postupak.

Protiv prvostepene presude žalbu je ponio Kantonalni tužitelj iz Zenice zbog odluke o krivičnopravnoj sankciji sa prijedlogom da se optuženom izrekne zatvorska kazna.

U odgovoru na žalbu branitelj optuženog predlaže da se žalba odbije kao neosnovana.

Sjednica vijeća drugostepenog suda održana je bez prisustva stranaka u smislu člana 319.st.1. ZKP-a FBiH jer stranke nisu tražile da budu obavještene o sjednici vijeća.

Drugostepeni sud je ispitao pobijanu presudu u onom dijelu u kojem se pobija žalbom Kantonalnog tužitelja, a u skladu sa članom 321. ZKP-a FBiH, pazeći po službenoj dužnosti, da li je na štetu optuženog povrijeđen Krivični zakon, te je odlučio kao u izreci, iz slijedećih razloga:

¹ Krivični zakon F BiH ("Sl. novine F BiH" broj: 36/03, 37/03, 21/04, 69/04, 18/05, 42/10, 42/11, 59/14, 76/14, 46/16, 75/17 i 31/23)

U žalbi se navodi da je prvostepeni sud dao prevelik značaj olakšavajućim okolnostima. Iz obrazloženja je nejasno da li je sud cijenio olakšavajuće okolnosti prilikom utvrđivanja visine kazne ili okolnosti zbog kojih je odredio izricanje uvjetne osude. Prema mišljenju žalitelja nije zanemariva činjenica da se optuženi kasnije zaposlio u društvu "Trimax" kojem je prodao stvari iz društva "Global trade", a što je prvostepeni sud propustio cijeniti.

Ovi žalbeni navodi su osnovani.

Naime, pravilno je prvostepeni sud prilikom izricanja krivično pravne sankcije cijenio optuženom Limo Sabriji kao olakšavajuću okolnost da je priznao izvršenje krivičnog djela koja mu se stavlja na teret, čime je u mnogome doprinio utvrđivanju činjeničnog stanja i skraćenju krivičnog postupka, te činjenicu da optuženi do sada nije ranije osuđivan.

Međutim, prema nalaženju ovog suda, pogrešan je zaključak prvostepenog suda da je izrečena sankcija srazmjerna stepenu odgovornosti optuženog i težini počinjenog krivičnog djela koje mu se stavlja na teret, te da će se uvjetnom osudom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Osnovano žalitelj navodi da je prvostepeni sud dao prevelik značaj olakšavajućim okolnostima, a sa druge strane te okolnosti nije cijenio nasuprot svih drugih okolnosti propisanih članom 49.st.1. KZ FBiH. Prije svega ovaj sud ima u vidu visinu štete pričinjene firmi „Milenium International Inc.“ Sjedinjene Američke Države za neplaćene preostale obaveze po navedenoj nagodbi u visini od 38.500 USD odnosno 66.372,38 KM, kao i Društvu „Global Trade" d.o.o. Visoko.

Dakle, navedena visina štete utiče na procjenu težine predmetnog krivičnog djela koje onda ako se tako posmatra ne može biti sankcionisano uvjetnom osudom kao mjerom upozorenja. Težina počinjenog krivičnog djela ne opravdava izricanje uvjetne osude.

Za konkretno krivično djelo počinjeno na ovaj način i sa prouzrokovanom štetom u navedenoj visini opravdano je izreći kaznu zatvora. Sud je prilikom odmjeravanja visine kazne uzeo u obzir i već utvrđene olakšavajuće okolnosti (priznanje i neosuđivanost) koje predstavljaju naročito olakšavajuće okolnosti te je trajanje kazne ublaženo ispod zakonskog minimuma. Naime, za krivično djelo Zloupotreba položaja ili ovlašćenja iz člana 383.st.1. KZ FBiH propisana je kazna zatvora od 6 (šest) mjeseci do 5 (pet) godina. Sud se odlučio ublažiti kaznu na osnovu člana 50. tačka b) KZ FBiH i izrekao je kaznu zatvora u trajanju od 4 (četiri) mjeseca.

Uzimajući u obzir sve naprijed utvrđene olakšavajuće okolnosti, drugostepeni sud nalazi da je žalba tužitelja osnovana i da se ne može očekivati postizanje svrhe krivičnopravnih sankcija izricanjem uvjetne osude navedenom optuženom, već da se to očekivanje može temeljiti samo u slučaju izricanja bezuslovne kazne zatvora i da će se na taj način ostvariti svrha kažnjavanja.

Zbog svega navedenog je na osnovu člana 329. ZKP-a FBiH i odlučeno kao u izreci.

Zapisničar

Anita Topić

Predsjednik vijeća

s.r. Tešnjak Nermin